



26. februar 2015

UPA 2015/44

### NAQQIISSUT

Siunnersuut 30. januar 2015-meersoq taarserpaa.

(Qulequtaa kisimi naqqiissutigineqarpoq)

Inatsisartut suleriaasianni § 33 naapertorlugu matumuuna Inatsisartut aalajangiiffigisassaattut siunnersuut imaattoq saqqummiuppara:

**Naalackersuinikkut sulinermit aningaasatigut tapiissuteqartarneq pillugu Inatsisartut inatsisaata allanngortinneqarnissaanut Naalackersuisut UKA15-imi allannguutissatut siunnersuuteqaqqullugit peqquneqarnissaannik Inatsisartut aalajangiiffigisassaattut siunnersuut, § 2 naapertorlugu partiinut tapiissutaasartut ersoqatigiinnerusumik agguataarneqarnissaat anguniarlugu, partiimut qinigaasumut tunngaviusumik tapiissutit 900.000 koruuninut annertusillugit, Inatsisartunullu ilaasortaatitamut ataatsimut tapiissutit 150.000 koruuninut annikillisillugit. Allannguut januaarip aallaqqaataani 2016-imi atuutilersinneqassaaq.**  
(Inatsisartunut ilaasortaq Justus Hansen, Demokraatit)

### Tunngavilersuut

Naalackersuinikkut sulinermit aningaasatigut pisortanit ukiumoortumik tapiissutaasartut Nunatsinni partiit isertitarisartagaasa annersarigaat isertuussanngilaq. Tapiissutaasartullu taakku ersoqatigiinnerusumik agguarneqartarnissaat Demokraatit kissaatigaat.

Malittarisassat ullumikkut atuuttut naapertorlugit, partiit Inatsisartunut ilaasortaatitaqartut 650.000 koruuninik tunngaviusumik tapiissutisisarput kiisalu Inatsisartunut ilaasortamut ataatsimut 210.000 koruuninik tapiissutisisarlutik. Ataatsimullu isigalugu, partiit ukiumut 9.760.000 koruuninik pissarsisarput. Tapiissutillu 2015-imut imatut agguataarsimapput:

Siumut: 2.960.000 koruunit.

Inuit Ataqatigiit: 2.960.000 koruunit.



Demokraterne: 1.490.000 koruunit.

Partii Naleraq: 1.280.000 koruunit.

Atassut: 1.070.000 kroner koruunit.

Agguataarinerup ersoqatigiinnermik tunngaveqarnerunissaa anguniarlugu, partiimut ataatsimut tapiissutit tunngaviusut 900.000 koruuninut qaffanneqarnissaat, Inatsisartunullu ilaasortamut ataatsimut tapiissutit 150.000 koruuninut appartinneqarnissaat Demokraatinit siunnersuutigaarput.

Taamatut agguataarisooqarnera partiit mikinerusut partiinut anginerusunut unammillersinnaassuseqarnissaannut pitsaanerusunik periarfissiissaaq, peqatigisaanillu aningaasat ersoqatigiinnerusumik agguataarneqarnerinik kinguneqassalluni. Tassunga atatillugu maluginiarneqassaaq, Inatsisartuni partiit tunngaviusumik aningaasartuutigisartagaat, partii angineq mikinerusorluunniit pineqaraluarpata, assigiimmata. Partiimmi mikinerit anginerillu Inatsisartuni siunnersuutigineqartunut oqaaseqaatissaminnik suliaqartarput, nutserisitsinermut akiliisarput, partiip allattaanik atorfeqartitsillutik nittartakkamik ingerlatsillutik ilaalu ilanngullugit. Partiit Inatsisartunut ikittuinnarnik ilaasortaataqartut partiillu amerlasuunik ilaasortaataqartut aningaasartuutaasa assigiinnerat paasinarpoq. Taamaammat naalackersuinikkut sulinermut aningaasatigut tapiissuteqartarnermut tunngatillugu, partiit mikinerusut ullumikkumut naleqqiullugu isiginiarneqarnerusariaqarput.

Siunnersuutigineqartoq akuersissutigineqassappat, partiit ataasiakkaat Inatsisartuni maanna ilaasortaataqarnikkut agguataarsimanerat tunngavigalugu naalackersuinikkut sulinermut tapiissutinik ima pissarsisinnaatitaallissapput:

Siumut: 2.550.000 koruunit (ullumikkumut naleqqiullugu 410.000 -nik ikinnerusunik)

Inuit Ataqtigiit: 2.550.000 koruunit (ullumikkumut naleqqiullugu 410.000-inik ikinnerusunik)

Demokraatit: 1.500.000 koruunit (ullumikkumut naleqqiullugu 10.000-inik amerlanerusunik)



Partii Naleraq: 1.350.000 koruunit (ullumikkumut naleqqiullugu 70.000-inik amerlanerusunik)

Atassut: 1.200.000 koruunit (ullumikkumut naleqqiullugu 130.000-inik amerlanerusunik)

Siunnersuutigisarpuk akuersissutigineqassappat, Inatsisartuni ilaasortat partiillu ullumikkut agguataarsimanerat aallaavigalugu, Nunatta karsiata partiinut tapiissutitut ukiumoortumik aningaasartuutigisartagai 9.150.000 koruuniussapput, tamannalu ullumikkumut naleqqiullugu ukiumoortumik katillugit 610.000 koruuninik sipaaruteqarnermik kinguneqassaaq. Taamaasilluta partiit nammineerlutik siunnersuutip aningaasalersornissaannut ersoqatigiillutik aningaasaliisuunissaat siunnerfigaarput. Nunatta aningaasaqarniarnikkut maanna inissisimanerani sipaarniartoqartariaqarlunilu sukannersumik pingaarnersiuisoqartariaqarpoq, taamaammat naalackersuinikkut sulinerlutik tapiissutitut qaffaaqqissangaluarutta tamanna naleqqutinnngilluinnassaaq.

Tassungalu atatillugu puigussanngilarput, partiinut tapiissutitut ukiut arlariit ingerlanerini malunnaatilimmik qaffakkiartorsimmata. Partiinut tapiissutitut ukioq 2000-imi ukiumoortumik 210.000 koruuniupput, partiillu Inatsisartunut qinersinermit kingullermit taasinerlutik ataatsimut 60 kr.-inik pissarsiaqartarlutik. 2000-imut aningaasanut inatsimmi siunertamut tassungalu 2.735.000 kr.-it immikkoortinneqarput. 2014-imullu aningaasanut inatsimmi naalackersuinikkut sulinerlutik tapiissutitut kontumi katillugit 9.760.000 kr.-it immikkoortinneqarput. Tapiissutitut taamaasillutik ukiut 14-it ingerlanerini 7 mio. kr.-it sinnilaarlutik amerleriarsimapput, agguaqatigiissillugu ukiumut millionip affaata missaanik amerliartorsimallutik.

Ukiumoortumik tapiissutaasartut saniatigut, partiit qineqqusaarnissaminnut tapiiffigineqarnissaminnik qinnuteqarnissaminnut aamma periarfissaqarput.

Siunnersuutitta amerlanerpaanit isumaqatigineqarnissaa Demokratinit neriuutigaarput.

**Pisortanut aningaasatigut allaffissornikkullu kingunerisassat.**



Inatsisartuni ilaasortat partiillu maannakkut agguataarsimanagerat tunngavigalugu, siunnersuutigineqartoq ukiumoortumik 610.000 koruuninik sipaaruteqartitsissaaq.

Siunnersuutigineqartumut atatillugu inatsisiliornikkut suliassat annikitsunnguupput, inatsisilerinermilu fuldmægtigep ukiumut 500.000 kr.-inik akissarsiaqartup akissarsiaata ukiumut naatsorsorlugit arfinilerarterutaat sinnernaviarnagit, ataasiartumik 80.000 kr.-it missaannik akeqassalluni.

Siunnersuut taamaalilluni ukiumi siullermi sipaarutaasunit akilerneqareersimassaaq.

**Namminersorluni inuussutissarsiuteqarnermut aningaasatigut allaffissornikkullu kingunerisassat.**

Soqanngilaq.

**Innuttaasunut aningaasatigut allaffissornikkullu kingunerisassat.**

Soqanngilaq.